

**Aatsitassanik piiavinni peqqissuunissaq isumannaatsuunissarlu pillugit ILO-p isumaqatigiissutaanut nr. 176-imut Naalagaaffeqatigiinnerup nangaassuteqarani Kalaallit Nunaat sinnerlugu akuersaaruteqarnissaa pillugu aalajangiiffigisassatut siunnersuut.**

(Inuussutissarsionermut Aatsitassanullu Naalakkersuisoq)

**pillugu**

**Inuussutissarsionermut Ataatsimiititaliap**

**ISUMALIUTISSIISSUTAA**

**Siunnersuutip aappassaaneerneqarnerani saqqummiunneqartoq**

Inuussutissarsionermut Ataatsimiititaliap suliarinninnermini makkunannga inuttaqarpoq:

Inatsisartunut ilaasortaq Naaja Nathanielsen, Inuit Ataqatigiit, siulittaasoq

Inatsisartunut ilaasortaq Andreas Uldum, Demokratit, siulittaasup tullia

Inatsisartunut ilaasortaq Kim Kielsen, Siumut

Inatsisartunut ilaasortaq Akitsinnguaq Olsen, Siumut

Inatsisartunut ilaasortaq Karl Lyberth, Siumut

Inatsisartunut ilaasortaq Knud Fleischer, Kattusseqatigiit Partiiat

Inatsisartunut ilaasortaq Aqqaluaq B. Egede, Inuit Ataqatigiit

Inatsisartunut ilaasortaq Jens Immanuelson, sinniisussaq, Siumut

Siunnersuutip UPA/2012-imi siullermeerneqarluni suliarineqarnerata kingorna ataatsimiititaliap siunnersuut misissorpaa matumuunalu Inatsisartuni suliarineqarnissaanut isummersuutini saqqummiullugit.

### **1. Siunnersuutip Inatsisartuni siullermeerneqarnera**

Inuussutissarsionermut Ataatsimiititaliap maluginiarpaa siunnersuut Inatsisartuni partiinit siammasissumik tapersorsorneqartoq.

## 2. Siunnersuutip imarisaa

Isumaqatigiisummi aatsitassarsiorfinni isumannaallisaanikkut sulinermilu pissutit pitsanngorsarnissaannut siuarsaaviginissaannullu tunngatillugu sulinermi atugassarititassat piumasaaqatissallu arlallit allaaserineqarlutillu nassiuiaatigineqarput. Atugassarititaasut piumasaaqatissallu tamakkua nunat tamalaat inatsisaat aqqutigalugu naalagaaffittut atuuttussanngortitsinissamut tunngaviussapput. Aatsitassarsiorfinni sulisitsisunut tunngaviusumik pisussaaffissat aammalu sulisunut tunngaviusumik pisinnaatitaaffissat isumaqatigiisummi aammattaaq aalajangersarneqarput.

Isumaqatigiisummut atatillugu ILO inassuteqaasiaqarpoq. Aatsitassarsiorfinni isumannaallisaaneq peqqissuserlu pillugit inassuteqaat nr. 183. Inassuteqaammi isumaqatigiisuttip aalajangersagartaani ilaatigullu aamma aatsitassarsiorfinni isumannaallisaanermut peqqissutsimullu navianarsinnaasut pillugit suleriesissatigit isumannaallisaanikkullu naleqquttumik iliusissaliorneritigit qanoq pinaveersimatitsisoqarnissaa upalungaarsimanissarlu itisilernerqarput.

## 3. Tusarniaatitsinermi akissutigineqartut

Saqqummiussisummi oqaatigineqarpoq tusarniaavigineqartut makkua tusarniaanermut akissuteqarnissaannik kaammattorneqartut:

*"Isumaqatigiisut SIK-mut, GA-mut ICC-mullu tusarniaassutigineqarpoq. ICC oqaaseqaatinik apuussivoq, Kalaallit Nunaatalu isumaqatigiisummut ilaalernissaa taassuma erseqqivissumik kaammattuutigaa. Kalaallit Nunaanni aatsitassarsiornerup siunissami annertuumik ingerlanneqalersinnaanera ICC-mit tikkuarneqarpoq, tamannalu pissutigalugu aatsitassarsiorfinni sulisut sullivimmi avatangiisitigit qulakkeerinniffiginissaasa qitiutinneqarnissaat aatsaat taama pingaaruteqartigaluni. SIK Namminersorlutik Oqartussanut siusinnerusukkat attaveqarsimavoq, Kalaallit Nunaata isumaqatigiisummut ilaalernissaa kissaatiginartutut nalunaarutigalugu."* Tusarniaaneq ataatsimiititalimit tusaatissatut tiguneqarpoq.

## 4. Ataatsimiititaliap siunnersuummik suliarinninnera

Inuussutissarsiornermut Ataatsimiititaliaq siunnersuut ataasiakkaatigit oqaaseqarfigissallugu pissutissaqarsorivoq. Aallaqqaasiutigalugu Kalaallit Nunaata isumaqatigiisummut akuersinissaa Ataatsimiititaliap isumaqatigaa. Taamatut alloriartoqarneratigit aatsitassarsiorfinni sulisunut isumannaallisaaneq peqqinnissarlu Kalaallit Nunaannit pimoorunneqarnerat nunarsuup sinneranut nittarsaanneqassammat. Nunatut ineriartortutut suliffeqarnikkut pitsaaliuinermi qaffasissumik inissisimareersutut, Kalaallit Nunaat aatsitassarsiorfinni sulisunut isumannaallisaanikkut sulinermi pitsaanerpaamik atugassaqartitsinissami nunarsuarmi nunani tapersersueqataasuni siuttuusariaqarpoq. Ataatsimiititaliaq isumaqarpoq Kalaallit Nunaat ajornaquteqanngitsumik isumaqatigiisuttip aalajangersagartaanut unammilligassartaanullu Kalaallit Nunaanni suliffeqarnikkut malittarisassat atuutereersut tunngavigalugit naammassinnilluarsinnaasoq. Kalaallit Nunaanni

aatsitassarsiorfinni suliffeqarnermi avatangiisitigut atugassarititaasut pillugit nakkutilliineq suliffinnik nakkutilliisunit isumagineqartarpoq, Naalagaaffiup ataani oqartussaaffigineqartoq.

### **5. Siunnersuutip aningaasatigut kingunerisinnaasai**

Naalackersuisut oqaatigaat isumaqatigiissutip atuutsinneqalerneratigut siunnersuutip aningaasatigut kingunerisinnaasai killeqassasut aningaasartuuteqarfiunerusussallu taakkua Naalackersuisoqarfimmut aningaasaliissutit iluini naammassineqarsinnaasut. Taamatut isumaqarneq ataatsimiititaliap isumaqatigaa.

Aatsitassarsiorfinnik nakkutilliinermut aningaasartuutit siunissami amerliartornissaat qularineqarsinnaanngilaq, maannakkut aatsitassarsiornikkut suliat ingerlasut piviusunngortinneqarlutillu aatsitassarsiorfittut ingerlalissappata. Taamaattorli tamatuma malitsigisaanik aningaasatigut kingunerisinnaasanut uparuaanissaminut ataatsimiititaliaq pissutissaqarsorinngilaq, tassami nunami suliffimmi avatangiisinik nakkutilliineq Naalagaaffimmit isumagineqarlunilu aningaasalersorneqarmat.


### **6. Ataatsimiititaliap inassuteqaataa.**


Siunnersuutip akuerineqarnissaa ataatsimiititaliap isumaqatigiittup inassutigaa.

Taamatut oqaaseqarluni isumaliutissiisummilu paasinninni naapertorlugu ataatsimiititaliap siunnersuut aappassaaniingassanngortippaa.


  
Naaja Nathanielsen,  
Siulittaasoq


  
Kim Kielsen

  
Aqqaluaq B. Egede

  
Andreas Uldum

  
Knud Fleischer

  
Akitsinguaq Olsen

  
Jens Immanuelson